

ধূমপান ছাড়তে ঈশ্বরের কাছে শাহরুখের প্রতিজ্ঞা

অনলাইন ডেস্ক|আপডেট: ১৪:৪১, ফেব্রুয়ারি ২৫, ২০১৫

Like &



ধূমপানে মাত্রাতিরিক্ত আসক্তির জন্য কুখ্যাতি আছে

‘বলিউড বাদশাহ’ শাহরুখ খানের। অনেক দিন থেকেই মারাত্মক এই বদভ্যাস ছাড়ার জন্য জোর চেষ্টা চালিয়ে যাচ্ছেন তিনি। কিন্তু কাজের কাজ কিছুই হচ্ছে না। তবে খুব শিগগির ধূমপান ছেড়ে দেবেন বলে ভক্তদের আশ্বস্ত করেছেন খান সাহেব। ধূমপান ছেড়ে দেওয়ার জন্য ঈশ্বরের কাছে প্রতিজ্ঞা করেছেন বলেও জানিয়েছেন তিনি।

সম্প্রতি টুইটারে নিজের ছবি প্রকাশ করে এর ক্যাপশনে শাহরুখ লেখেন, ‘যারা ধূমপান করে, তাদের সঙ্গে আমরা কথা বলি না!’ টুইটার বার্তায় তিনি আরও লেখেন, ‘১০০ মিটার দৌড়াতে হবে...সারা রাত ধরে...হাফ হাফ পাক পাক...!’

টুইটার বার্তায় শাহরুখ আসলে কী বোঝাতে চেয়েছেন তা স্পষ্ট না হলেও এক খবরে বলিউডলাইফ ডটকম জানিয়েছে, এই বার্তার মাধ্যমে ইশারা-ইঙ্গিতে শাহরুখ বলতে চেয়েছেন, তিনি ধূমপান ছাড়ার চূড়ান্ত চেষ্টা করছেন। চিকিৎসকদের পরামর্শ মতে, ১০ মিনিট জগিং করলে ধূমপানের ইচ্ছা দূর হয়। এ থেকে বোঝা যায়, ধূমপানের ইচ্ছা দূর করতেই দৌড়াতে চেয়েছেন শাহরুখ। ধূমপান ছেড়ে দেওয়ার চেষ্টার কথা জানিয়ে শাহরুখ টুইট করার পর অনলাইনে হইচই পড়ে যায়। তাঁর ভক্ত ও শুভাকাঙ্ক্ষীরা অপেক্ষা করতে থাকেন, শাহরুখ কখন ধূমপান ছেড়ে দেওয়ার ঘোষণা দেন। সম্প্রতি এ বিষয়ে জানতে চাইলে শাহরুখ বলেন, ‘হ্যাঁ, সম্প্রতি আমি ধূমপান ছেড়ে দেওয়ার চেষ্টার কথা জানিয়ে টুইট করেছিলাম। কিন্তু এখনো আমি ধূমপান ছাড়তে পারিনি। আমার আশপাশে যারা ধূমপান করে, তাদের একদমই ভালো লাগছে না আমার।’

শাহরুখ আরও বলেন, ‘আমি সব সময় বলেছি, ধূমপান খুব খারাপ একটি অভ্যাস। দয়া করে আপনারা ধূমপান করবেন না। আমি ঈশ্বরের কাছে প্রতিজ্ঞা করেছি, খুব শিগগির ধূমপান ছেড়ে দেব। তবে এখন পর্যন্ত আমি এটি ছাড়তে পারিনি। যখনই সেটা ঘটবে, তখনই চিৎকার করে ধূমপান ছাড়ার ঘোষণা দেব আমি।’